

Di ducj i dons dal Spirtu Sant, cumò al covente il don dal coragjo

O imagjinais che nol è tant facil metisi a fevelâ a tante int, a tancj furlans, dopo un taramot di chê fate. Mi permetarês di jessi ancje un pôc comovût. E us dîs graciis che o sês vignûts. Voaltris forsit o pensais che us disi graciis dome parcè che o sês in tancj. Us dîs graciis ancje parcè che a son chi a contânus: cirîf di capîmi tal plui bon sens, ma e je vere.

O ai trê robis di dîus, come al solit. La prime e je cheste: che fra il 1270 e il 1334 cheste glesie no à funzionât. E jere plene di baraçs, plene di jerbatis: al jere stât il taramot. Ma graciant Idiu, al è rivât un om di coragjo, che si clamave Bertrant, de basse France, che le à tornade a meti a gnûf.

Al è clâr che no feveli di Bertrant... Jo o speri simpri che tra nô furlans, predis o no predis, al vebi di vignî fûr chel Bertrant che al torni a taiâ i baraçs dal Friûl e la jerbe salvadie che e cressarà in chescj mês, par tornâ a meti a gnûf dut. Se però mi domandais se jo o viôt che al ven: no lu viôt!

No ai sintût par nuie cricâ il dì de nestre ricostruzion, ancjemò. A son di chei che nus disin che la gnot e scuen durâ a lunc. No volarês che e fos une gnot dulà che i gjai no cjantin. Ma propit devant di une robe dal gjenar, viodint che chei che ur tocje in non de politiche, in non de funzion publiche, di dî ce che al va dit, e no lu disin, come simpri nus tocje a nô predîs di dîlu! E voaltris o savês che nô predis furlans, e sarà passade cualchi ete che o vin tasût, ma o vin fevelât simpri pal nestri popul. O podarês acusânus e dînus che no si sin impegnâts cun chel o cun chel altri, ma tal non di Diu o vin simpri cirût di fevelâ pal nestri popul. Par chel popul che o fevelarìn ancje chest an che al ven; parcè che chel an che al ven a son 900 agns che chel sant om di Indrî IV di Cjanosse al à fat duce il Patriarcje di Aquilee. 900 agns de indipendence dal Friûl no podìn lassâju passâ cuiets cence vignî a preâ, a dî grazie a Diu, a chel Bon Diu, par chel che nus à fat, e a domandâi il coragjo pal avignî.

Ma o ai dôs altris robis che lis ai te anime e no pues tasê. AI è vêt, il Friûl nol pues, di bessôl, pensâ di jevâ in pîts. AI à bisugne di ducj, e graciis a ducj chei che nus àn dade une man. Però nol vûl dî che nol è di ministrâsi di bessôi... Nol è just! Nol è just! Nol è just, in non di Diu, che la rinassite dal Friûl si vebi di ministrâle insieme cun cualchidun altri, che nô ancje o rispjetìn, però la plee de ricostruzion o vin di dâle nô e dome nô, sbaliant nô e dome nô, induvinantle nô e dome nô, parcè che se no o assistìn al ultin at de colonizazion che e dure dal 1420.

E cumò mi scoltâs la seconde robe: chei - e ur disìn graciis di cûr - che a àn volût fânus regâi, che nus ai fasin cemût che nus plasìn, no cemût che ur plasìn. Nô o sarìn stramps, o sarìn un popul cemût che al è, ma il regâl che nus plâs al è chel che nus plâs a nô, no chel che ur plâs a ducj chei altris, parcè che se no o preferìn restâ cence regâi.

Une ultime robe e je cheste. Jo o crôt che il Stât talian al è un stât che i sin stâts simpri fedêi dal 1866 in ca: pues stâi che o vebin sbaliât par ecès di fedeltât, però o sin stâts simpri fedêi e no volin continuâ a no jessilu. No stait a vê pôre che jo o seti chi a stiçâ la int cuintri dal guvier: no, no! Però o dîs che se pardabon nus vûl ben, nol à di dânus bêçs: al à di lassânus chel che o vin. AI à di dânus chê autonomie par la cuâl lis aghis e la fuarce eletriche no diventin statâls, ma a restin furlanis. AI à di dânus plui partecipazion tes tassis che o pain. AI à di dânus il dirit di comerciâ cui fradis slovens e todesc, che o sin stâts plui di mil agns insieme. Parcè che, cjalait int furlane, cjalait che al è tant difarent dâ bêçs da part dal Stât, e lassânus chei che o vin. Lassânus chel che o vin no je caritât: e je dome justizie. E voaltris o savês che nô furlans, pluitost che tirâ jù il cjapiel e domandâ la limuesine, o vin miôr patî la fam. Che nus lassin ce che o vin, che nus cressin la autonomie che nus covente.

E lassait che us disi une robe par chei che nus aministrin cumò, che e pues jessi ancje buine int... e pues jessi stade a scuele cun me in 'seminari. Ur dîs une robe: che no stedin a fâ pierdi la pazienze al bon e al tolerant. Tai Proverbis di Salomon e je une peraule che e dîs cussì: guai cuant che al piert la pazienze il puar! Ur domandin une robe: se no son bogns di aministrâ, che a vebin il coragjo di lâ vie; se a son bogns di aministrâ a àn di vê il coragjo di criticâ i lôr superiôrs. Nol è lecit plui te nestre tiere, nol è lecit no vê coragjo. Chel che no lu à pe nestre int, nol servìs la int, al servìs cualchidun altri. In non di Diu, cumò, ancje il Spirtussant che al veve siet dons, in Friûl a 'nd à un sôl: chel dal coragjo. E alore, mi capîs ce che o vûl dîus cumò: cheste robe no vâi dome pes autoritâts civîls, ma e vâi ancje par chês gleseastichis: se no àn coragjo, che a vadin a confessâsi! Chi al covente il coragjo. E a àn di dânus l'esempli, a àn di sielzi tra servî un popul che forsit ur domande di vê il coragjo di dî di no a cualchidun, e no sielzilu, e alore no reste che une robe: chê di ricognossi di no servî la puare int.

O ai finît! O varès tantis robis di dîus, ma grazie a Diu o vignarai a cjatâus, se o pues, tes vuestris parochiis. Però, chei trê pinsîrs che o ai dit culì jo o prei che ju scoltin lis autoritâts civîls e gleseastichis che a varessin vût di jessi culì cun nô vuê, ma par mancjance di coragjo no son. O disìn graciis a di chei sindics che a son vignûts culì. Sêso inacuazûts di une robe? A son i predis che a àn invidâts i sindics a sei chi cu la int, a pâr, insieme cun lôr, combatint e tignint dûr, no dismenteantsi di une robe: che tignint dûr, cualchi volte e rive la soluzion di dut, cuant che al semee che dut al sei pierdût.

Tignint dûr o salvarin la nestre vite ancje cheste volte, in chest mont, no dome ta chel altri.

*Aquilee, ai 11 di Lui dal 1976,
te fieste dai sants Ermacure e Fortunât,
grande liturgjie pal Friûl taramotât*